

Company Name : Pharmaniaga Berhad
Date : 18 July 2019
Source : Berita Harian

Hafsah dilantik Pengerusi Pharmaniaga

Pharmaniaga Bhd melantik Datuk Dr Hafsah Hashim, bekas Ketua Pegawai Eksekutif SME Corporation Bhd sebagai Pengerusi Bukan Eksekutif Bebas, berkuat kuasa semalam.

Dalam kenyataannya, syarikat itu berkata, ia turut melantik tiga Pengarah Bukan Eksekutif Bebas yang baharu, iaitu Tan Sri Dr Mohd Ismail Merican, Datuk Mohd Shahrom Mohamad dan Datuk Mohd Zahir Zahur Husain.

Senarai pelantikan itu turut termasuk Datuk Koo Hock Fee sebagai Pengarah Bukan Eksekutif Bukan Bebas.

"Dengan pengalaman luas dan kepakaran mereka merentasi industri, kumpulan yakin mereka akan membolehkan Pharmaniaga terus maju dalam landasan pertumbuhannya," menurut syarikat itu dalam kenyataannya, semalam.

Hafsah, yang menerajui SME Corp selama lebih 13 tahun, juga adalah ahli Lembaga Pengarah Johor Corporation, Zurich Takaful Malaysia Bhd dan Sirim Bhd.

Sementara itu, Dr Mohd Ismail bertanggungjawab menubuhkan unit pakar hati pertama di Malaysia, dan menjadi penasihat kepada Royal College of Phy-

sicians, London sejak 1997.

Beliau kini adalah Pro-Canselor dan Pengerusi Lembaga Pengelola MAHSA University serta pakar perunding hepatologi dan pakar perubatan dalaman di Pusat Perubatan Prince Court.

Mohd Shahrom mempunyai kerjaya undang-undang yang cemerlang dan terbabit dalam banyak perjanjian strategik berprofil tinggi, kontrak dan projek selama bertahun-tahun, termasuk perjanjian konsesi kerajaan di Malaysia dan antarabangsa.

Beliau kini adalah ahli Chartered Institute of Arbitrators, London, penimbang tara Pusat Timbang Tara Antarabangsa Asia dan Felo Institut Penyelesaian Pertikaian Alternatif Asia.

Mohd Zahir sebelum ini adalah Ketua Pegawai Kewangan Kumpulan Prasarana Malaysia Bhd dari 2012 hingga 2015 dan kemudian

menjadi Ketua Pegawai Eksekutif anak syarikatnya, Prasarana Integrated Development hingga 2017.

Beliau mempunyai pengalaman yang luas dalam bidang pengauditan, perakaunan dan kewangan dan kini adalah ahli Akauntan Bertauliah Australia dan New Zealand serta Institut Akauntan Malaysia.

Sementara itu, Hock Fee telah memegang beberapa jawatan kepimpinan dalam pelbagai syarikat dalam Boustead Group dan kemudian dilantik kepada jawatan semasanya sebagai

Pengarah Bahagian, Bahagian Perindustrian kumpulan pada 2005, pada masa sama, Pengarah/Penasihat kepada UAC Bhd.

Beliau juga Felo Institut Akauntan Bertauliah England dan Wales serta ahli Institut Akauntan Malaysia.

BERNAMA

Hafsah Hashim

